

փափագները, մենք հարցրինք գինու մասին: Նա շփոթած մնաց եւ, երկար մտածելուց յետոյ, պատասխանեց.

– Կարծեմ պետք է, որ մի քիչ գտնուի. վանահայրը կես շիշ պահած ունէր «բաժակի» համար:

Յետոյ նա նստեց մեզ մօտ, սկսեց մի առանձին հոգածութեամբ պատմել, թէ շատ անգամ մեծ դժոարութիւններ են կրում, երբ «բաժակի» գինին սպառուում է, եւ վանահայրը համարեա միշտ մի հրաշքով է ձեռք բերում, որ սուրբ խորհուրդը կատարուի: Եւ անելացրեց, թէ ինքը չէ իմանում ե՞րբ կամ ի՞նչ ժամանակ է պատահել, բայց լսել է, որ Վան քաղաքի մօտ մի վանք կայ, որ կոչուում է «Կռունկի վանք». մի անգամ սուրբ խորհուրդը կատարելու միջոցին պատարագիչ հայր սուրբը տեսնում է, որ գինի չկայ եւ, չկամենալով ընդհատել պատարագը, մինչեւ գնային, գտնէին եւ բերէին, նա սկսում է աղօթել: Յանկարծ, աստուծոյ հրամանով, մի կռունկ թռչելով ներս է մտնում տաճարի լուսամուտից եւ, իր կտցի մէջ բռնած, երեւում է խաղողի մի ողկոյգ: Նա ուղիղ մօտենում է սուրբ խորհրդի սեղանին. պատարագիչը առնում է նրա կտուցից ողկոյգը եւ քամում է սկիհի մէջ: Այն օրից այդ վանքը կոչուեցաւ «Կռունկի վանք»:

Արեղայի պատմութիւնը բաւական էր, որ թե՛ ես եւ թե՛ Ասլանը հրաժարուէինք մեր բաղձանքից եւ նրանց այնպիսի մի դժոար դրութեան մէջ չդնէինք, որ ստիպած լինէին թռչունների միջոցով գինի ստանալ, թէեւ նրա պատմութիւնը այդ նպատակով ասոած չէր, այլ անելի այն նպատակով, որ երիտասարդ արեղան ցոյց տայ, թէ ինքն էլ մի բան գիտէ:

– Մեր վանքումը, – ասաց նա, – ոչ մի ըմպելիք չէ գործածուում, բացի ջրից: Ուխտաւորներին անգամ արգելած է իրանց հետ ըմպելիքներ բերել:

Այդ միջոցին լսելի եղաւ ճաշոյ ժամի կոչնակի ձայնը: Թէեւ այդ անապատը եկողը պետք է հետեւեր վանական բոլոր կանոններին, բայց արեղան, ինայելով մեզ, մեր հետ պատահած դժբախտութեան պատճառով, չպահանջեց մեզանից իսկոյն եկեղեցի գնալ, այլ, ներողութիւն խնդրելով, ինքը հեռացաւ, խոստանալով, որ պատարագը վերջացնելուց յետոյ դարձեալ կը գայ եւ մեզ կտանէ սեղանատունը ճաշելու:

Խուցը, որ պատրաստել էին մեզ համար, ի հարկէ, վանքում գտնուած ամենամաքուր, ամենայարմարաւոր օթեւաններից մէկն էր: Բայց դա եւս ուրիշ ոչնչի նման չէր, եթէ ոչ մի մթին հաւաքոյնի նման: Յատակը ծեփած էր կաւով, որի վրայ, իբրեւ սփռոց, տարածել էին պրտուներից եւ ճահճային բոյսերից գործած մի հասիր (փսիաթ): Բայց մեզ պատուելու համար՝ անելացրել